

454 Das dreyzehende Buch Petri de Crescentijs/

wenig gestossen Saffran vermischet/schmieret/welches allerley Ungezifer vnnnd vnfauberkeit/als da seyn Fliegen / Flöh vnnnd dergleichen/ hinweg nimpt / Darzu auch ein starcke Haut/ vnnnd sonst steiffe feste Glieder machet. Man sol die Hündin auch zu weilen also wie die Junge schmieren/ vnnnd Brunnkressen Safft dar vnter vermischen / damit sie ihren Jungen kleine Flöhe oder ander Ungezifer zubringe.

Wenn die jungen Welff fünfzehnen Tag alt werden / mag man sie auß dem Fass vnd ihrem Läger lassen/ vnd acht Tag hernach ihnen ein Grad vom ihrem Schwanz vnd Wurzel abschlagen/ vnd so sie zu sehen vnd essen anfangen / sol man ihnen allzeit gute warme Milch zu essen geben/ Man sol sie auch vor zweyen Monden von der Hündin nich nehmen/ oder in ein Dorff schicken/ denn je länger sie an ihr saugen / je besser sie sich nach ihr zu arten pflegen / zu dem gibt es die erfahrung/ daß wo ein Hündin welfft/ vnd du dieselbige halber selbst/ vnd halber von einem Schafrüden auffbringen lasset/ diese nimmer so gut vnnnd so wol gerathen / als wenn sie die Mutter selbst allein behalten vnd auffbracht hette.

Das zwölffte Capitel.

Merckzeichen wo bey man junge Hund/ob sie gut oder nicht/ erkennen sol.



Ialten haben zu sagen pflegt / daß man die besten Hund an der Hündin Brust erkennen möge/ die besten aber seyn diese/ welche am nechsten bey dem Herzen saugen/ wegen des Geblüts/ so vmb das Herz ganz lebendig/ subtil vnd rein/ vnd am aller kräftigsten zu seyn pflegt. Man kennet sie auch am Hals/ daran sie etliche rauhe harte Haar wie Bürsten stehen haben/ vnd wo derselbigen vngerad/ ist es wol ein gutes/ wo aber gerade/ ein sehr böses Zeichen. Etliche haben auch achtung auff die hindern Schenckel vnd Affterklawlin/ so sie daran haben/ Da denn ein Hund die hab/ sey es ein sehr gut Zeichen/ da er aber zween hab/ haltet man für ein ganz böses Zeichen. Es seyn auch etliche/ so ihnen in den Hals vnd Rachen schawen/ welcher so er schwarz vnnnd der Gumm fast braunfarb ist/ sollen sie gut/ wenn er aber rot/ ganz böß/ vnd nichts nus seyn/ Darzu wenn sie fein weite offene Naslöcher haben/ ist ein gute anzeigung/ daß gewislich wol suchende Hund dar auß werden / Was sonst das ander vnd vbrige an ihrem Leib betrifft / kan man von demselbigen nicht wol ehe/ sie seyen denn drey oder vier Monat alt vrtheilen. Doch halt ich die jenigen/ welche fein lange/ breite vnd dicke Ohren/ vnd vnden am Bauch hart vnd rauhes Haar stehen haben/ für die besten/ welches den auch / wie es die erfahrung gibt / die aller besten seyn.

Das dreyzehende Capitel.

Wie man junge Hund nicht in Stätten bey den Fleischbäncken/ sonder auff den Dörffern auffziehen sol.



Wenn junge Hund zween Monat gesogen/ vnd nunmehr selbst essen können / sol man sie auff die Dörffer schicken / an ein fein lustigs Ort/ nahe bey einem Wasser/ vnnnd weit von den Bäumen der Wilden Rüllen / denn wo sie des Wassers nicht gewohneten / vnd zu ihrem alter vnd starcke kommen weren/ hetten sie sich der Wüt zu befahren von wegen ihres Bluts/ so sonst drucken vnnnd hisig verblieben/ da das Wasser solches fein temperiert/ vnnnd in guter nahrung/ zunemmung vnnnd kräften erhaltet. Also auch verderben sie sich bey den wilden Rüllen/ wie jedem Jäger wol bewust/ zu Feld sol man sie mit Milch/ Brot vnd allerley Suppen speisen vnnnd auffziehen/ Vnd ist zu wissen/ daß ihnen die Nahrung auff den Dörffern vnd Feld bey weitem besser / denn die in Stätten vnter den Fleischbäncken bekomme / bevorab/ wenn sie nicht eingesperret/ sonder ihrer Nahrung vnd dem Jagen wenn sie wollen nachlauffen mögen. Sie gewohnen hiemit auch der Kälte/ Wind/ Regen/ Schnee/ vnd alles andern Ungewitters/ auch des zamen Viechs/ welches sie nachmals/ weil sie bey demselbigen vfferzogen/ mit Jagen vnd Anfallen wol zu frieden vnnnd gehen lassen. So sie aber in Stätten vnter den Fleischbäncken auffgezogen werden / so verderbt das Fleisch